



JUDICIAL SYSTEM MONITORING PROGRAMME

PROGRAMA MONITORIZASAUN SISTEMA JUDISIÁL

Komunikadu Imprensa

15 Agostu 2013

JSMP kontinua fasilita treinamentu ba comunidade iha Suco Dai-Sua Distritu Manufahi

Iha 15 Agostu 2013, Judicial System Monitoring Programme (JSMP) liu husi Unidade Legál Research Unit (LRU) hala'o atividade treinamentu ho tópiku promove "justisa ba ema hotu" iha Suco Dai-Sua - Same, Distritu Manufahi.

Partisipantes ba treinamentu ne'e kompostu husi estrutura suco hanesan xefe suco, xefe aldeia, pesoal apoiu administrasaun suco, lia-nain, joventude suco, inklui comunidade. Partisipantes treinamentu ne'e hamutuk ema nain 30, kompostu husi feto na'in 15 no mane na'in 15.

Materia treinamentu ne'ebé apresenta iha treinamentu ne'e kobre asuntu direitus umanus, sistema justisa Timor Leste, kna'ar autóridade judisiáriu sira hanesan juis, prokurador, no natureza servisu defensor públiku no advogadu privadu sira, polisia hanesan ajente investigador, konseitu krime públiku no semi públik, direitu no dever arguidu no vítima nia iha prosesu penál tuir lei aplikavel. Aliende ne'e, materia importante seluk mak relasiona ho tipu kazu krime sira.

"Komunidade barak mak laiha koñesimentu kona-ba lei no oinsá atu asesu ba justisa tuir dalan justisa formal. Tanba ne'e, JSMP atividade ne'e importante atu lori informasaun legál ba comunidade sira iha área rural hodi aumenta sira nia koñesimentu hasa'e konfiansa comunidade sira ba sistema justisa formal," dehan Diretór Ezekutivu JSMP Luis de Oliveira Sampaio.

Xefi de Suco Dai-Sua, Sr. Alexandrinho Tilman iha nia abertura hateten katak nia agradese tebes ba JSMP tanba bele hili nia suco hodi hala'ó atividade treinamentu kona-ba lei.

Xefe suco ne'e hatutan katak treinamentu kona-ba lei importante tebes atu nune'é sira bele hatene wainhira atu rejolve kazu no kazu saida deit mak bele rejolve iha nivel suco no kazu saida mak tenke lori ba sistema justisa formal. Antes nia konklui nia abertura, nia husu ba partisipantes sira atu participa treinamentu ne'e too remata no bele habelar liutan informasaun ne'ebé hetan husi treinamentu ne'e ba iha comunidade seluk iha suco laran ne'ebé la iha oportunidade hodi participa iha treinamentu refere.

Durante treinamentu, partisipantes sira entusiasmu atu hatene liutan kona-ba materia no apresiasaun ba JSMP tanba bele fahe informasaun ne'ebé durante ne'e sira nunka hatene ka nunka iha koñesimentu kona-ba asuntu sira ne'e.

JSMP mós distribui manual materia kona-ba "justisa ba ema hotu" hamutuk 180 ezemplar. Distribuisaun ne'e objetivu katak hatutan liu tan ba comunidade seluk iha suco laran.

Kada partisipante sei hetan manual 6 hodi kontinua distribui ba comunidade seluk iha sira nia suco laran.

JSMP hein katak ho meus ne'e la'os deit partisipantes ema na'in 30 mak iha koñesimentu ba materia sira ne'ebé sira hetan durante treinamentu, informasaun sira ne'ebé bele habelar klean liu tan ba comunidade sira seluk.

Tuir planu treinamentu ne'ebé hanesan sei realiza iha Setembru 2013, iha Distritu Oe-Cusse.

Atividade trenamentu ne'e realize tanbá hetan suporta husi UNDEF.

Atu hetan informasaun liu tan bele kontaktu direktamente ba:

Luis de Oliveira Sampaio
Diretór Ezekutivu JSMP
Diresaun e-mail : luis@jsmp.minihub.org
Telefone : (+670) 3323882/729579
Face book : jsmp.timorleste